

Espainiak eta Frantziak eginiko erasoei irmoki erantzutera bideratuko ditu indarrak HBk

Eraikuntza Nazionalaren bidean «motor lana» egiteko konpromisoa berretsi du

Ainhara Zuazabeitia / Arantzazu

Hego Euskal Herri osotik iritsitako 360 lagunekin Euskal Herriaren egoera politikoa aztertu ondoren, HBko ordezkariak amaitutzat eman zuten atzo joan den igandean abiatutako gogoeta-barrualdia. Eraikuntza nazionalen «motor lana» egiteko konpromisoa hartu eta «erasoei erantzun irmoa emateko asmoz» indar guztiak horretara bideratuko dituela HBk esan zuten.

EUSKAL HERRIAREN eraikuntza nazionala lortzeko bidean «motor lana» egiteko konpromisoa hartu zuen atzo HBk, Arantzazun egingako Batzar Nazionalen. Horrekin batera, azken egunotako «eraso askotarikoei» Lizarra-Garaziko talde guztiek elkarrekin erantzuteko «aukera erreala» dagoela azpimarratu zuen Joseba Permachek, eta gaineratu zuen HBk indar guztiak erabiliko dituela «erantzun komun eta irmo hori ahalbidetzeko».

Hego Euskal Herriko 360 ordezkari joan ziren atzo Arantzazura, Euskal Herriko egoera politikoa azterketa egitera. Joseba Permache mahai nazionalakideak azaldu zuenez, Lizarra-Garaziko Akordioaren balioa azpimarratu zuten batzarrean, prozesu «geldiezina» dela azpimarratuz. «Nazio eraikuntzarako apustua martxan da, herriak hitza hartu baitu», gaineratu zuen.



GARI GARAIALDE

Hego Euskal Herri osotik iritsitako 360 lagunek egoera politikoa aztertu zuten Batzar Nazionalen, Arantzazun.

Gero eta batasun handiagoa

Lizarra-Garazin dauden alderdi, sindikatu eta talde sozialen arteko «batasuna» gero eta handiagoa dela esan ondoren, Frantziako eta Espainiako Gobernuen «urduritasuna» aipatu zuen, eta «egonezin» horri lotu zion azken egunotan gertatutakoa. «Irailaren 12an Lizarran hasi genuen prozesua leher-tarazi nahi dute Madrilek eta Parisek», esan zuen Permachek, eta horren lekuko ipini zituen EAJ, EA eta IUri egiten ari zaizkien presio politiko eta mediatikoak, HBren kontrako errepresioa eta preso- en sakabanaketa egoerak segitza. Nolanahi ere, ezker

abertzaleak eta HBk apustu politikoa «indartu» egingo dutela adierazi zuen, Lizarran hasitako bidetik jarraitzeko asmoz. «Euskal Herri independentea eraikitzen ari gara, lurraldetasuna errespetatzen duen orubea», nabarmendu zuen. Horrenbestez, egungo egoera «latza» gaindi-

tzeko lanean jarraitzeko konpromisoa berretsi zuen Joseba Permachek.

«Euskal Herriko beste sektore abertzale eta aurrerakoiekin batera, eraiki egingo dugu gure herria, eta motor lana egiteko prest dago ezker abertzalea», Permachek azaldu zuenez.

Elkarrizketaren bideari ekiteko eskatu dio Espainiako Gobernuari Rifondazione Comunistak

Milango Udaleko (Italia) Rifondazione Comunistak zinegotzi taldeko Umberto Gai eta Davide Tinellik elkarrizketaren bideari ekiteko eskatu diote Espainiako Gobernuari. Gai eta Tinelliren arabera, azken egunotan izandako polizia operazioak eta HBko egoitzen miaketak urrats «arriskutsuak» dira, eta gaineratu dute elkarrizketaren bidea dela «bailio duen bakarra».

Auzitegi Konstituzionala Gobernuaren erabakiak bideratzeko dela salatu du Iñaki Anasagastik

Hartzen dituen erabakiak bideratzeko erabiltzen duela Espainiako Gobernuak Auzitegi Konstituzionala salatu zuen atzo Iñaki Anasagastik. Kurduen erbesteko Legebiltzarrari EAEko Legebiltzarreko eraikuntza uzteko Mahaiak hartu erabakia errekurrituko du gobernu zentralak. Hori, Legebiltzarraren subiranotasunaren kontrako erabakia dela esan zuen jeltzaleak, gaineratuz Aznarren gobernuak nahiago duela Turkiako Gobernuarekin, erakunde demokratiko batek erabakitakoa baino.

HBk bat egin du Jarraik gaurko antolatutako mendi ibilaldiarekin

Erredakzioa / Donostia
HBk bat egin du Jarraik gaurko gazte erakundeak gaurko antolatu duen mendi ibilaldiarekin, eta «bake bidea aurkitzeko itxaropenean dagoen euskal gizarte osoari, eta gazteei bereziki» dei egin die bertan parte har dezaten. Bi zutabek osatuko dute mendi martxa hau. Bata Areetatik (Getxo) aterako da, eta bestea Portugaletetik. Goizeko 10:30etan abiatuko dira zutabe biak, eta arratsaldeko

17:30etarako iritsiko dira Bilbora, ordu horretan hasiko den manifestazio nazionalarekin bat eginez. HBren arabera, «ezinbestekoa da gazteriari bultzada ematea, kontuan izanik errepresio gogorra bizi duela Espainiako Gobernuaren aldetik». PPren eta PSOEn helburua Jarraik «egurtu eta kriminalizatzea» dela dio HBk, eta «elkartasuna» adierazi behar zaiola erakundeari, «Euskal Herriko etorkizuneko aurpegietako bat» delako.